



16.08.2022

UKA2022/141

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata nr. 21, 28. november 2016-imeersup atorunnaarsinneqarnissaa pillugu siunnersuummik, kingusinnerpaamik UKA2023-mi, saqqummiussinissamut Naalakkersuisut peqquneqarnissaannik Inatsisartut aalajangaaffigisassaattut siunnersuut.

(Inatsisartunut ilaasortaq, Pele Broberg, Naleraq)

Tunngavilersuut:

Soraarnerussutisiaqarnissamut aaqqissuussinermut pinngitsoorani ilaanissaq pillugu inatsisip siunertarineqartumik uniuuisimanagera ukiuni kingullerni marlussunni ersarissimavoq.

Siunissaq ungasissoq eqqarsaatigalugu, aammali innuttaasut ulluinnarni atugaannik eqqarsaatiginnittumik, eqqarsarnissaq Naleqqamut aalajangiisuuvoq. Ilaatigut Covid-19 aamma Ukrainemi sorsunneq, kiisalu ingerlatseqatigiiffiutitta kisermaassisut ingerlaarfiinik atuiinnerneq eqqarsaatigalugit, atuisartunut akigitinneqartut nalinginnaasumik qaffariaateqarujussuarsimanagerat maannangaaq takuneqarsinnaalereerpoq.

Tamatuma qaavatigut soraarnerussutisiaqarnissamut aaqqissuussinermut pinngitsoorani ilaanissaq suli piumasaaqatigineqarpoq, naak tamatuma atorunnaarsinneqarnissaa Naleqqap tungaanit 2022-mut aningaasanut inatsisissamut qitiusumik ilaatinneqarsimagaluartoq.

Taamaattumik soraarnerussutisiaqarnissamut aaqqissuussinermut pinngitsoorani ilaanissap nammineq kajumissuseq tunngavigalugu ilaaffigineqartussanngortinneqarnissaanik Naalakkersuisut Inatsisartunit peqquneqarnissaannik maanna tigussaasumik



Naleraq

siunnersuuteqarpugut, taamaaliortoqarneratigut inatsit pisariaarutsinneqassammat, imaluunniit atorunnaarsilluinnarneqassammat.

Qujanartumik takusinnaavarput sulisartorpassuaqartoq soraarnerussutisiaqalernissamut ileqqaagaqarnissamut ersarissumik ilinniartinneqarsimasunik, taamaattumik inatsit asuliinnavissimangilaq. Kisianni ajoraluartumik aamma takusinnaavarput inatsit isumaginninnikkut eqquinerluttoq, tamatumanilu pingaartumik ilaqtariit SIK tunngavigalugu akissarsiaqartut naammattusaariniarnerminnik ajornartorsiuteqartut.

Tamatuma peqatigisaanik inatsimmut oqaaseqaatini ersarissorujussuarmik aamma takuneqarsinnaavoq, inatsit pisortani sipaarniuteqartoqarnissaanik siunertaqanngitsoq, taamaallaalli inuuniarnikkut atugassarititaasut pitsaassusaannik qaffassaanissamik siunertaqartoq, taamaaliornikkullu utoqqalinersiat imaaliallaanaq allanngortinneqarsinnaanngitsut.

Siunnersuutip pisortanut aningaasatigut allaffissornikkullu kingunerisassai:

Siunnersuut akuersissutigineqassappat pisortanut aningaasatigut allaffissornikkullu kingunerisassai piffissaq tamaat ukiup ilivitsup iluani ukiup affaata iluani suliaqarnerup iluani ingerlanneqarsinnaassapput, 250.000 koruunit taamaaqatigisaannik. Kingunerisassat nassatarisaannik pisortat inuinnaat soraarnerussutisiaqalernissamut atugarisaannik artukkorsorneqartariaarutissapput, aamma isumaqatigiissutini sulisunilu allaffissornikkut sipaarutissanik suliaqartoqarsinnaassaaq.

Siunnersuutip namminersorluni inuussutissarsiuteqarnermut aningaasatigut allaffissornikkullu kingunerisassai:

Namminersorluni inuussutissarsiornermut aningaasatigut allaffissornikkullu sipaarutissaqalissaaq, taakkua soraarnerussutisiassanut maleruagassanik najoqqutassarsiortariaarutissammata.



Naleraq

Siunnersuutip innuttaasunut aningaasatigut allaffissornikkullu kingunerisassai:

Innuttaasunut aningaasatigut allaffissornikkut sipaarutissaqartoqalissaaq, innuttaasut aningaasaqarnikkut annerusumik atugassaqalissammata.